



Gerth Mikaelen, Naleraq  
inatsisartut@inatsisartut.gl  
Inatsisartunut ilaasortaq

**Tasiilami kiffartuussinissamut isumaqatigiisummi inissisimaneq pillugu § 37  
naapertorlugu apeqquteqaammut 2026-096-imut akissut**

Ulloq: 25-06-2026  
Suliap nr.: 2026 - 10876  
Akt-ID.:26544710

Asasara Gerth

Inatsisartut suleriaasianni § 37 naapertorlugu Tasiilami Tunumilu kiffartuussinissamut isumaqatigiisummut tunngasut pillugit Naalakkersuisunut apeqquteqaateqarputit. Apeqqutitit uannit akineqartussatut innersuunneqarput. Apeqqutitit matuma kinguliani ataasiakkaarlugit allanneqarput, akissummillu malitseqarlutik.

Postboks 909  
3900 Nuuk  
Tlf.: (+299) 34 50 00  
E-mail: box909@nanoq.gl  
www.naalakkersuisut.gl

**Apeqqut 1 Naalakkersuisut Tasiilami angallannermut ilungersunartumut  
nutaamik angallannermut isumaqatigiisummik  
isumaqatigiissusiorusussinnaappat, piffissaq qanittoq  
eqqarsaatigalugu?**

AKISSUT: Tasiilap eqqaani qulimiguulimmik angallassinissamut kiffartuussinissamut isumaqatigiisut atuuttoq allangortinneqarsinnaanngilaq aammalu 2030-p naanissaata tungaanut atuuttussaalluni. Taamaattumik qanittumi kiffartuussinissamut isumaqatigiisummik nutaamik isumaqatigiissuteqarnissamut maannakkorpiaq pilersaaruteqanngilaq.

Kisianni anigorniagassat Tasiilap eqqaani qulimiguulimmik angallassinermi pisimasut Naalakkersuisut eqqumaffigaat. Air Greenland paasissutissiivoq ingerlatseqatigiiffiup teknikkikkut anigorniagassat pilersartut iluarsineqarnissaat pingaarnersiuiinermi salliutikkai, aammalu kiffartuussinissamut isumaqatigiissutip atuuttup killissaasa iluanni ingerlatsinerup aalajaatsunngortinnissaa sulissutigalugu.

Naalakkersuisut Tunumi angallannikkut sullissinerup nukittorsarneqarnissaa aammalu killissaliussat atuuttut iluanni pitsanngorsaanissamut periarfissanik misissuinissaq, immikkut ukkataraat. Taamaattumillu isumaqatigiissutitigut, aningaasaqarnikkut angallassinikkullu killissat atuuttut iluanni iliuuseqarnissamut periarfissat suut atorneqarsinnaanersut misissuinissaq sulissutigineqarpoq.

**Apeqqut 2 Naalakkersuisut nutaamik angallannermut, Nuummiit Kulusummut  
Island-nimullu utimullu angallannissamut isumaqatigiisummik  
isumaqatigiiniarsinnaappat piffissami qaninnerusumi?**

AKISSUT: Nuup, Kulusuup aamma Islandip akornanni timmisartuussinernut angallannermut isumaqatigiisummik nutaamik isumaqatigiissuteqarnissaq pillugu Naalakkersuisut maannakkorpiaq aalajangiisimangillat. Kisianni Tunumi angallannikkut sullissineq Naalakkersuisuni pingartinneqarpoq, taamaattumillu isumaqatigiissutitigut, aningaasaqarnikkut angallassinikkullu killissat atuuttut iluanni pitsanngorsaanissamut

periarfissat aamma iliuuseqarnissamut periarfissat suut atorneqarsinnaanersut, Naalakkersuisoqarfinni misissorneqarpoq.

Naalakkersuisut kiffartuussinissamut isumaqatigiissutinut pisariaqartitsineq aammalu angallannikkut sullissinermi naleqqussaasoqassanersoq, ingerlaavartumik nalilersortarpaat. Kiffartuussinissamut isumaqatigiissutinut pisariaqartitsineq aallaaviatigut tunngaviusut makkua aammalu aningaasanut inatsimmi allassimasut, malillugit aallaaviatigut nalilersorneqartarpoq:

- Assartuussinissamut periarfissaqannginnera – Pisortat tapersiingippata tapiiffigineqanngitsumik atugassaqartitsiviusumik pissusiviusuni assartuussinissamut periarfissaqassanngikkaluarnersoq,
- Akigititat unamminartuunissaannik qulakkeerinissaq - Bilitsinut imaluunniit nassiusanut akigititat pisortanit tapiiffigineqanngikkunik qaffasippallaalissanersut,
- Akuersaarneqarsinnaasumik akulikissuseqarnissaa – Pisortat tapersiingippata assartuussineq akuttuallaassanersoq, taamaalilluni najukkani innuttaasut pisariaqartitaannut naammattutut nalilernerqarani,
- Angallannerup ataqatigiinnissaa – Taamaangippat angallannerup ilusaani pingaarnertigut ataqatigiissitsineq annertuumik ajorseriartussaansersoq.

Taamaattumik Nuup, Kulusuup Islandillu akornanni timmisartuussinernut tunngatillugu, angallannermut nutaamik isumaqatigiissuteqartoqassappat, tamanna tunngavissarititaasunut taakkununga sanilliullugu ataasiakkaatigut nalilersorneqartussaassaaq, ilanngullugu pisariaqartitsisoqarnersoq tapiiffigineqanngitsumik atugassaqartitsiviusumik imaluunniit isumaqatigiissutitigut killissat atuuttut iluanni naammassineqarsinnaanngitsumik.

### **Apeqqu 3 Imaluunniit Nuummiit Kulusummut Kangertsaaivanillu utimullu angallannermut isumaqatigiissummik isumaqatigiissusiorsinnaappat piffissaq qaninnerusoq eqqarsaatigalugu?**

AKISSUT: Nuummut, Kulusummut aamma Nerlerit Inaannut (Kap Tobin/Kangertsaaiva) taakkunangaaniillu timmisartuussinermut nutaamik angallannermut isumaqatigiissuteqarnissaaq pillugu maannakkorpiaq Naalakkersuisut aalajangiisimangillat, tassami Norlandair-imut kiffartuunneqarnissamut isumaqatigiissuteqartoqareemat.

### **Apeqqu 4 Taamaangippat sooq Naalakkersuisut taamaaliorusungillat?**

AKISSUT: Maannakkorpiaq Akureyri / Reykjavik aamma Nerlirit inaata akornanni timmisartuussinissamut Norlandair-imut kiffartuunneqarnissamut isumaqatigiissuteqarfigineqarpoq. Naalakkersuisut kiffartuunneqarnissamut isumaqatigiissutinut pisariaqartitsinermut aamma angallannikkut sullissineq naleqqussartariaqarnersoq ingerlaavartumik nalilersuisarput. Kiffartuunneqarnissamut isumaqatigiissutinut pisariaqartitsineq aallaaviatigut apeqqummut 2-mut akissummi tunngaviusut nassuiarneqartut aammalu aningaasanut inatsimmi allassimasut malillugit aallaaviatigut nalilersorneqartarpoq.

## **Apeqquut 5 Nipaatumik inuerusaarusaaneq ingerlanneqarpa?**

AKISSUT: Toqqaannangitsumik ilatsiinnartumillu inuerusaanissamut periuseqarnissaq, ilaasunik angallassinermut kiffartuussinissamut isumaqatigiissummut siunertaanngilaq, kisianni siunertaavoq tapiiffiqineqanngitsumik ingerlatsineq kisiat atorlugu naammattumik assartuussinissamut neqeroorutinik attassisoqarsinnaatinnagu, nuttarsinnaassutsinik nukittorsaanissaq.

Tunumi ineriartorneq Naalakkersuisunut suliassaqqarfiuvoq pingaartinneqartoq.

Naalakkersuisooqatigiinnissamut isumaqatigiissummi suli allassimavoq, Tasiilami mittarfiliornissap sulissutigineqarnera ingerlaqqissasoq. Tamanna tunngavigalugu Tasiilami mittarfiliorsinnaaneq pillugu misissuinerit pilersaarusionerullu suliaralugit ingerlateqqinnissaannut 2026-mut ukiumut aningaasaliiffiusumut 2 mio. koruunit immikkoortinneqarput.

Aammattaaq oqaatigineqassaaq, Naalakkersuisut aamma Danmarkimi naalakkersuisut akornanni sinaakkutissatut isumaqatigiisut naapertorlugu Ittoqqortoormiini nunap immikkoortuani nutaamik mittarfiliornissaq sulissutigineqarmat. Suliassap atugassiivigineqarnerata ingerlaqqinnissaa, Tunumi silaannakkut angallannerup siunissami ilusiligaanissaa aqqissuussaanaa pillugit Naalakkersuisut ataatsimoortumik isumaliutersuuteqarneranni pingaarutilittut ilaatinneqassasoq naatsorsuutigineqarpoq.

## **Apeqquut 6 Tunumiut nunap sinneratuut naleqannginnamik?**

AKISSUT: Inuit tamarmik assigiimmik naleqarput!

Tunumi angallannikkut anigorniagassat pakatsinissamut pissutissaqalersitsisinnaasut aammalu suliassaqqarfik naammangitsumik pingaartinneqartoq misigisimalersitsisinnaasoq, Naalakkersuisut paasilluarpaat. Ajornartorsiut annertuujuvoq Naalakkersuisut annertuumik pimoorullugu. Tamannarpiaq pissutigalugu maannakkorpiaq qulimiguulinnut isumaqatigiisutit pitsanngorsarneqarnissaat sulissutigaarput aammalu Tasiilami Ittoqqortoormiinilu mittarfiliassanut aningaasanut inatsimmi aningaasassanik immikkoortitsisimalluta, taamaalilluta Tunumi aalajaannerusumik ataqqinninnerusumillu attaveqaasersuutinik pilersitsisinnaassalluta.

Peqatigisaanik Tunumi angallannikkut sullissinerup nukittorsarneqarnissaa aammalu killissaliussat atuuttut iluanni pitsanngorsaanissamut periarfissanik misissuinissaq, immikkut ukkatarara. Suliassaqqarfik uanni pingaartinneqarpoq, taamaattumillu isumaqatigiisutitigut, aningaasaqarnikkut angallassinikkullu killissat atuuttut iluanni iliuseqarnissamut periarfissat suut atorneqarsinnaanersut Naalakkersuisoqarfinnut misissoqquara.

**Apeqquut 7 Tasiilarmiut eqqaamiuilu nunap sinneranut Naalakkersuisuniit  
suusupagiinarneqarusunneruppat?**

AKISSUT: Naamik. Tasiilami eqqaanilu innuttaasut soqutigineqangitsut pineqangillat.

Tunami angallannikkut anigorniagassat innuttaasut ulluinnaannut, inuussutissarsiortunut aammalu sumiiffimmi nalinginnaasumik ineriartortitsinermut pingaaruteqartorujussuusut Naalakkersuisut ataqqivaat. Taamaattumik suliassaqarfik Naalakkersuisut ukkataraat.

Qanittumi ungasissumilu suliniutissat sulissutigineqarput. Qanittumi Air Greenland qanimut oqaloqatigalugu qulimiguulimmik sullissinermi inissisimaneq malinnaavigineqarpoq, ilanngullugu kiffartuunneqarnissamut isumaqatigiissutip atuuttup killissaasa iluanni ingerlatsinerup aalajaatsunngortinnissaa pitsanngorsarnissaalu sulissutigineqarluni.

Ungasinnerusumut Tunumi attaveqaasersuutitigut periarfissat sularineqarnerat ingerlateqqinneqassaaq. Naalakkersuisooqatigiinnissamut isumaqatigiissummi allassimavoq, Tasiilami mittarfimmik nutaamik sanaartornissamut sulariarneq ingerlateqqinneqassasoq, aammalu Tasiilami mittarfittaarsinnaaneq pillugu misissuinerit pilersaarusernerullu sularialugit ingerlateqqinnissaannut 2026-mut ukiumut aningaasaliiffiusumut 2 mio. koruunit immikkoortinneqarput.

Tamatuma saniatigut Naalakkersuisut aamma Danmarkimi naalakkersuisut akornanni sinaakutissanut isumaqatigiissut naapertorlugu Ittoqqortoormiini nunap immikkoortuani nutaamik mittarfiliornissaq sulissutigineqarpoq.

Naalakkersuisut taamaalillutik Tunumut sammisumik aalajangersimasunik suliniuteqarpoq aammalu sumiiffimmi angallannikkut sullissineq apeqquataavoq Naalakkersuisuni suli immikkut ukkatarineqartoq.

Neriutigaara matuma siulianiittuni apeqquutit akineqartut.

Inussiarnersumik inuulluaqqusillunga

*Iddimangiu Jensen Bianco*

Iddimangiu Jensen Bianco